

**Pisortat illuutaat A/S Ini-miit aqunneqartut suli imermut attaveqanngitsut tamarmik  
attavilersorneqarnissaasa pilersaarusiornissaa siunertaralugu Naalakkersuisut  
suliassamik piareersaasioqqullugit peqquneqarnissaannik Inatsisartut  
aalajangiiffigisassaattut siunnersuut**  
*(Saqqummiussisoq Inatsisartunut ilaasortaq Doris Jakobsen, Siumut)*

**pillugu**

**ISUMALIUTISSIISSUT**

**Siunnersuutip aappassaaneerneqarneranut tunniussaq**

Suliarineqarnerani Ataatsimiititaliami kingullermik uku peqataapput:

Inatsisartunut ilaasortaq Karl-Kristian Kruse, Siumut, siulittaasoq  
Inatsisartunut ilaasortaq Jens B. Frederiksen, Demokraterne, siulittaasup tullia  
Inatsisartunut ilaasortaq Nikolaj Jeremiassen, Siumut  
Inatsisartunut ilaasortaq Kalistat Lund, Inuit Ataqtigiit  
Inatsisartunut ilaasortaq Aqqaluaq B. Egede, Inuit Ataqtigiit

Ulloq 22. oktober 2013 UKA 2013-imi siullermeerneqareermat Ataatsimiititaliap siunnersuut misissorpaa.

**Siunnersuutip imaa aamma siunertaa**

Siunnersuuteqartup matumani siunnersuutimigut kissaatigaa, pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersaarusiornissaa siunertaralugu Naalakkersuisut suliassamik piareersaasioqqullugit peqquneqassasut.

**Siunnersuutip Inatsisartuni siullermeerneqarnera**

Iliusissanut pilersaarutini teknikkikkut sukumiisortaannut immikkoortiterlugit atorsinnaasunik suliaqarnissamik kissaateqarneq tunngavigalugu siullermeerinermut Naalakkersuisut ima allannguutissatut siunnersuuteqarput:

*”Pisortat illuutaat A/S INI-miit aqunneqartut suli imermik pilersuiffimmut  
attavilerneqanngitsut tamarmik imermik pilersuiffiliorfigineqarsinnaanissaannik*

*pilersaarusiornissaq siunertaralugu, iliuuseqarnermut pilersaarummik suliaqarnermi annertussusissaata aningaasartuutissallu misissornissaannik Naalackersuisut peqquneqassasut Inatsisartut aalajangiiffigisassaattut siunnersuut.”*

Partiit amerlanerussuteqartut Naalackersuisut allannguutissatut siunnersuutaat tapersersoraat, Atassut allannguutissatut siunnersuut itigartinneqassasoq inassuteqarpoq.

Siullermeerinermi oqallinneq tunngavigalugu, kiisalu partiit oqaaseqaatai tunngavigalugit partiit amerlanerussuteqartut akornanni siunnersuut Sanaartornermut ataatsimiititaliamut suliaassanngorlugu innersuunneqartoq paasinarsivoq.

### **Ataatsimiititaliap siunnersuummik suliaqarnera**

Nunami innuttaasunut tamanut inuuniarnermi atugassarititaasut akuerineqarsinnaasut, ullutsinnut naleqquttut peqqinnartullu isumannaarneqarnissaannut ataatsimut isigalugu kisaateqarneq Ataatsimiititaliap tapersersornartippaa, siunnersuullu una ilorraanut alloriarnertut isigalugu. Taamaalilluni siunnersuummi siunertarineqartut Ataatsimiititaliap isumaqatigai.

Ataatsimiititaliap allannguutissatut siunnersuut ima paasivaa, pisortat illuutaanni tamani INI A/S-imit aqunneqartuni, kiisalu imermik pilersuinermit attavilerneqareersimangitsuni imermik pilersuinermit sanaartorsinnaanermut pilersaarusiornermi akissaaajaatit annertussusaat erseqqissarniarlugit Naalackersuisut misissuinissamik peqquneqassasut. Taamaalilluni Ataatsimiititaliap isumaqarpoq, siunnersuummi uani imaluunniit allannguutissatut siunnersuummi iliuusissatut pilersaarutaasinnaasumik atortuulersitsinissamut Naalackersuisut *peqquneqanngitsut*.

Ataatsimiititaliap isumaqarpoq, Kalaallit Nunaat tamakkerlugu imermik pilersuinermit siunissami suliniarnermit pilersaarut atortussaassasoq pingaarutilik atorsinnaasorlu; imermilli pilersuineq tamatumani immikkoortillugu taamaallaat pineqanngilaq, aammali inuuniarnermi atugassarititaasut akuerineqarsinnaasut, ullutsinnut naleqquttut peqqinnartullu pillugit arlaatigut uuttuuteqarnissaq isumannaarniarlugu ataatsimut suliaqarniarnermit atatillugu. Taamaalilluni Ataatsimiititaliap erseqqissaatigissavaa, siunnersuut una suliniutitut immikkoortutut Naalackersuisunit taamaallaat suliniutigineqassanngitsosq pingaaruteqartuosq, kisiannili ineqarnerup tungaatigut naalackersuinikkut annertuumik suliniutit ilaattut suliniutigineqassasoq, taannalu nunami innuttaasut inuuniarnerannut pisariaqartut pitsanngorsarnissaannut ilapittuutaassaaq.

Naalackersuisut akissumminni iliuusissatut pilersaarummik misissuinermit pissutsit arlallit ilanngunneqartariaqartut taavaat. Iliuusissatut pilersaarutip atorsinnaanera isumannaarniarlugu aamma iliuusissatut pilersaarummut akissaaajaatit annikinnerpaaffianiitinniarlugit Naalackersuisunit aamma uku ilanngunneqassasut Ataatsimiititaliap kaammattuutigissavaa:

- Illut imermik pilersuinnermut suli attavilerneqarsimanngitsut ataatsimut isigalugu pitsaassusaasa nalilerneqarnissaat, taamaalillutik illut piiarneqarnissaminnut piareertut sanaqqitassat iml. piiannagassat imermut attaveqaasernissaat pilersaaruserfigineqassanngitsut.

Teknikkimut tunngasutigut iliuusissatut pilersaarummut atorsinnaasumut akissajaatinik naliliinnermut nunaqarfinni illoqarfinnilu illut ataasiakkaat pillugit teknikkimut tunngasunik paasisaqarnissap ilanngunneqarnissaat apeqqutaatissanganneqarmat, kommunit, INI A/S-ip aamma Nukissiorfiit akuutinneqarnissaat pisariaqassasoq Ataatsimiititaliaq isumaqarpoq, taamaattumillu tamatuma Naalakkersuisunit isumannaarneqarnissaa kaammattuutigalu.

Erngup errortorfikup iliuuseqarfigineqartarnera suli kommuninit tigummineqarpoq. Imermik pilersuinnermik attavilerneqarneq peqatigalugu erngup errorfikup annertussusaata allanngornissaa naatsorsuutigisariaqarmat, iliuusissatut pilersaarut pillugu kommunit sapinngisamik piaartumik akulerutsinneqarnissaat Naalakkersuisut isumannaartariaqaraat Ataatsimiititaliaq isumaqarpoq. Taamaalilluni erngup errorfikup annertuseratarsinnaanerani naliliinissaq aamma iliuuseqarneq pitsaasumik isumannaarneqarsinnaavoq.

### **Siunnersuutip aningaasatigut kingunerisassai**

Inatsisartut suleriaasianni § 33, imm. 1-imi allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassasut.

Taamaattorli isumaqarnarpoq siunnersuutip piviusunngortinnerani aningaasatigut kingunerisassai naammattumik allaaserineqarsimanngitsut. Taamaammatt siunnersuutip piviusunngortinnera aningaasatigut kinguneqassanersoq Ataatsimiititaliap peqqissaartumik isumaliutigisimavaa.

Siunnersuutip siullermeernerani Naalakkersuisut akissuteqaataanni takuneqarsinnaavoq, Nukissiorfiit Ikamiuni imermik pilersuinnermik misissuinnissaannarmut 400.000 koruuninik immikkoortitsisimasut. Taamaalilluni Ikamiuni INI A/S-ip illuutaanut imermik pilersuinnermut sanaartornermi akissajaatit missingersuusernermi tassani ilaatinneqanngitsut Ataatsimiititaliap paasivaa, taamaallaalli nunaqarfinni imermik pilersuinnernissamik misissuinnermut akissajaatit matussuserneqarneqarnissaat naatsorsuutigineqartoq. Taamaattumik nuna tamakkerlugu nunaqarfinni 57-ini illoqarfinnilu 17-ini tamani imermik pilersuinnermut sanaartornermi periarfissat, killiliinerit aamma ilaatittariaqartut il.il. misissornissaanni akissajaatit siunnersuutigineqaaqqartumi taaneqarsimasunit AC-tut atorfilimmut kr. 500.000-ini aningaarsartuutissatut naatsorsuutigineqartunit annertunerungaartumik akissajaateqartoqassasoq Ataatsimiititaliap naatsorsuutigisariaqarpaa.

Aamma misissuinerup taamaattup malitsigisinnaasaanik akissaajaatit amerlasuut atorlugit suliniuteqarnerup isiginiarnerani, kommunit sapinngisamik piaartumik akuutinneqalernissaannut Ataatsimiititaliap Naalakkersuisut kaammattoqqikkusuppai. Inissiat iluarsagassatut naleqqutilersimasut, imeq errorfikoq aamma kuuffilioratarsinnaanerit apeqqutaatillugit misissuinermi illut ilumut taakkuussanersut isiginiarneranni kommunit najukkami illut pillugit ilisimasaasa sapinngisamik piaartumik ilaativinneqarneranni iliuusissatut pilersaarutaaratarsinnaasumi akissaajaatit annikillisinneqarsinnaanerit naatsorsuutigisariaqarpoq.

Taamaattumik iliuusissatut pilersaarutip suliarineqarnerata annertussusissaanut taakkunungalu akissaajaatissanik naliliinissamut Naalakkersuisut allannguutissatut siunnersuutaat Ataatsimiititaliap tapersersorpaa. Naatsorsuutigisariaqarportaaq iliuusissatut pilersaarutip teknikkikkut tunngasutigut atorsinnaasup ilassutitut nalunaarusiat amerlanerusut suliarineqarnissaannut pisariaqartitsineq aamma allaffissornikkut akissaajaatinik tassunga atasunik pisariaqartitsineq annikillisikkumaassagaa. Illut INI A/S-imit aqunneqartut imermik pilersuinermit attavilerneqarnerannut atatillugu iliuuseqarnissamut siunissami naalakkersuinikkut aalajangiinernut iliuusissatut pilersaarut taamaattoq toqqaannartumik atornerqarsinnaassaaq, taamaalillunilu nunatsinni nunaqarfinni illoqarfinnilu illut pitsanngornissaannut alloriarnerussalluni.

### **Ataatsimiititaliap inassutai**

Ataatsimiititaliap **isumaqatigiittup** Naalakkersuisut allannguutissatut siunnersuutaat akuerineqassasoq inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.

---

Karl-Kristian Kruse  
Siulittaasoq

---

Jens B. Frederiksen

---

Nikolaj Jeremiassen

---

Kalistat Lund

---

Aqqaluaq B. Egede